

## Kódigo

---

**Na 2009 a introdusí e kódigonan di Corporate Governance den Karibe Hulandes (ku eksepshon di Aruba). Esaki tabata djis promé ku desmantelashon di Antia Hulandes. Hulanda, durante e negosiashonnan na 2008, na último momentu a fiha komo kondishon adishonal pa e desmantelashon, pa introdusí un ordenansa nashonal i un Kódigo di Corporate Governance**

Esakinan lo mester a bai kontu pa entidatnan ligá na gobièrnu tantu riba nivel sentral komo riba nivel insular. Polítika lokal a para ariba ku mester a desmantelá Antia Hulandes i asina a traha i introdusí e kódigonan akí den purá pa e anterior teritorionan insular Kòrsou, St. Maarten, Boneiru, Statia i Saba. A traha un kódigo similar di Corporate Governance pa e entidatnan ligá na gobièrnu di pais Antia Hulandes. Esaki tabata nesensario pasó tantu riba nivel insular komo riba nivel sentral tabatin kompania- i fundashonnan di gobièrnu.

E sistemátika ku a skohe na 2009, tabata enserá ankramentu di e kódigonan den un ordenansa nashonal sentralisadó : e respektivo ordenansa insular. E ordenansa akí a imponé riba e anterior teritorionan insular i riba Pais, komo stakeholder den un entidat ligá na gobièrnu, entre otro un kompromiso pa introdusí e kódigo den e entidatnan konserní. Téknikamente esaki mester a sosodé dor di adaptá e statutonnan. Banda di esei, a regla den e ordenansa insular / nashonal, ku den kaso di algun desishon importante di e akshonista, lo mester a pidi konseho delantá serka un kolegio konsultativo independiente. Pensa akí riba desishonnan relashoná ku nombramentu i retiro di atministradó- i komisionan i riba desishonnan tokante bendementu òf atkisishon di akshon.

Nunka e kódigo akí no tabata direktamente aplikabel den niun entidat ligá na gobièrnu. Esaki lo no por tampoko den e sistema di lei. Di pursori, tabatin i tin kantidat di empresanan ligá na gobièrnu kaminda e pais tin solamente un parti di e akshonnan. A base di Buki 2 di Kódigo Sivil, esaki lo tin komo konsekuensia, un distinsion no-otorisá entre akshonistanan, si un akshonista (teritorio insular òf Pais) lo por a imponé un regulashon (legal) riba un otro akshonista. E formulashonnan di e kódigo mes tambe ta hasi bon kla , ku mester inkluí un stipulashon separá den e statutonnan di e entidatnan konserní pa por laga e kódigo bira aplikabel.

Pa islanan BES, kosnan a kana otro. Despues di e desmantelashon, e anterior teritorionan insular akí a pasa pa e sistema gubernamental hulandes. Kada un di nan a bira asina-yamá munisipionan spesial òf Organismonan Públiko. Den e periodo promé ku 2010, e sistema legislativo ku tabata na vigor riba e islanan akí tabata un kombinashon di legilashon di Antia Hulandes i legilashon insular. Na 2010, a pone mayoria di e leinan akí riba un asina-yamá 'lista positivo'. Esaki tabata regulashon lokal ku lo a keda na vigor despues di e desmantelashon. Di un òf otro manera, e ordenansa nashonal di Corporate Governance tampoko no a resultá riba e lista positivo.

Ku esaki, e base tékniko-legal di e Kódigo di Corporate Governance den e entidatnan ligá na gobièrnu riba e islanan di Boneiru, Saba i Statia tambe a disparsé. Pues no tin un base legal mas pa aplikabilidad di e kódigo riba e islanan akí. No tin un buskamentu di konseho obligatorio tampoko serka un otoridat independiente.

Esaki no ta nifiká ku e Kódigo di Corporate Governance lo no por ta aplikabel den entidatnan ligá na gobièrnu riba e islanan akí. Sinembargo, den lei no tin un kompromiso mas stipulá pa e Organismo Públiko pa sòru ku ta stipulá aplikabilidad di e kódigo den e statutonnan. Si e statutonnan di un N.V. òf fundashon di gobièrnu na islanan BES no eksigí esaki eksplísitamente, e Kódigo di Corporate Governance no ta aplikabel pues pa e N.V. òf fundashon ei. Mas aleu, Islanan BES tin falta di e

---

supervishon preventivo di un Konsehero di Corporate Governance òf un Corporate Governance Council. Den pasado a resultá ku e supervishon akí ta hasi hopi falta. Esaki ta un bon motibu pa e legisladó hulandes bolbe chèk e sistema legal bon.



[Frank Kunneman](#)  
VanEps Kunneman VanDoorne  
Attorney at law | Partner

T +5999 461 3400 ext. 254

E [kunneman@vandoorne.com](mailto:kunneman@vandoorne.com)

---